

Membongkar Rahsia Kuala Sungai Merah

*20 Jan 2007, New Sabah Times, Halaman 8
Jakaria Dasan*

Rombongan UMS seramai 22 orang telah mengadakan lawatan selama dua hari ke kg. Long Pasia pada 11-12 Disember 2006. Long Pasia atau sebagaimana maksudnya dalam bahasa Lundayeh iaitu Kuala Sungai Merah (Long Pa' Sia) terletak pada kedudukan **4°5'U, 115°7'T**. Jaraknya dari Pekan Sipitang ialah sejauh 180 km. Setelah beberapa lama begitu sukar dihubungi, dan suatu ketika hanya dapat dihubungi oleh pengunjung luar menggunakan kapal terbang kecil dan ringan, akhirnya Long Pasia dapat juga dikunjungi melalui perjalanan darat menggunakan jalan yang selalu dilalui oleh lori balak yang tidak begitu elok permukaannya. Bagaimana pun pada musim hujan jalan tersebut agak bahaya untuk dilalui. Pengalaman rombongan UMS menceritakan segalanya.

Walaubagaimana pun sebaik sahaja jalan Sipitang ke Tenom siap sepenuhnya, jangka masa perjalanan ke Long Pasia akan pasti mengambil masa yang lebih singkat dari sebelumnya. Kerja-kerja pembinaan dan penaiktarafan jalan begitu giat dan rancak dijalankan di awal perjalanan ke Long Pasia..


Dua hari sebelum rombongan yang menggunakan 3 buah kereta pacuan empat roda yang membawa Naib Canselor dan Pegawai Utama UMS bertolak ke Long Pasia, Bahagian keselamatan UMS, yang diketuai oleh Kapten Haznain Ngamil telah terlebih dahulu bertolak ke destinasi bersama-sama dengan Ketua Penyelidik Dr Ismail Ali dan Mejari Abdul Talib Arifin. Kumpulan ini menceritakan bagaimana kereta mereka tergelincir beberapa kali dan hampir terkubur dalam jalan tanah merah yang becak dan berselut disebabkan hujan yang turun di sepanjang perjalanan dari Sipitang. Setelah empat jam dialun dan dilambung dalam kereta pacuan empat roda

yang padat, mereka akhirnya tiba di kampung Miligan, iaitu 30 km dari destinasi yan dituju. Walaubagaimana pun, mereka terpaksa bermalam di sekolah kampung berkenaan kerana air hujan yang turun dari arah bukit telah menenggelamkan satu-satunya jambatan kampung yang tembus ke Long Pasia dengan ketinggian dua meter dari jambatan. Kedalaman air sungai ke jambatan ialah setinggi 5 meter.

Pada jam 5:30 petang di perkampungan yang dikelilingi banjaran berbukit dan masih 'dara' lagi hutannya itu, apatah lagi di musim hujan, siangnya cepat benar berlalu. Pada jam 6.00 petang, kelam malam cepat benar berlabuh. Nasib baiklah ada bilik darjah di SK Miligan yang boleh dijadikan tempat berlindung malam itu. Kumpulan ini hanya dapat bertolak ke Long Pasia yang terletak kira-kira 45 km pada sebelah paginya. Jalan dilalui masih licin, berbecak dan berselut. Mereka tiba di Kampung Long Pasia pada sekitar jam 10.00 pagi, 10 Disember 2006.

Pagi 11 Disember 2006, jam 8.00 pagi rombongan Naib Canselor dan Pegawai Utama lainnya dengan diiringi oleh kenderaan Bahagian Keselamatan UMS yang diketuai oleh Kapten Haznain bertolak ke Long Pasia dari Pekan Sipitang. Mujurlah pada hari tersebut hujan tidak turun. Setelah 3 setengah jam perjalanan akhirnya papan tanda kampung, "Welcome to Long Pa' Sia – Tau Mefafu Baruh" pun kelihatan. Dari tempat letaknya papan tanda itu, seluruh rumah dan bangunan yang ada dalam perkampungan itu dapat dilihat dengan jelas. Banjaran bukit Sarawak di sebelah kanan dan banjaran bukit Kalimantan di sebelah kirinya. Menakjubkan dan sungguh mempersonakan pemandangan di kampung ini.

Kedatangan rombongan UMS disambut baik dan mesra oleh penduduk kampung. Ketua Kampungnya En Mudin Sia dan Pengerusi JKKNya En Andrew Laban menanti dan



memberikan layanan yang cukup istimewa kepada kunjungan UMS. Setiap lawatan dalam kawasan perkampungan Long Pasia pastinya akan diiringi oleh kedua-dua pemimpin ini bersama-sama dengan sebahagian besar penduduk kampung. Yang pastinya kita pasti tidak akan menyangka bahawa di kampung yang terpencil ini, pembangunannya lebih baik daripada kampung-kampung yang berhampiran pekan. Jalan dalam kampungnya berturap melalui rumah-rumah dan bangunan yang ada, tenaga solar disambung hampir ke semua rumah sebagai sumber tenaga elektrik, telefon awam juga tersedia dengan menggunakan “Kad Rakyat,” dan termasuklah perkhidmatan dari beberapa jabatan dan agensi kerajaan seperti, Klinik Desa, Sekolah Rendah, Tabika/Tadika Kemas, dan lain-lainnya.

Di sebelah malamnya, sambutan UMS telah diserikan lagi dengan acara kebudayaan dari suku kaum Lundayeh. Dalam ucapan Ketua Kampung dan Pengerusi JKJK, mereka amat gembira kerana UMS merupakan satu-satunya Universiti yang mengadakan lawatan kali pertama ke Long Pasia sejak merdeka, atau mungkin lebih baik disebut sejak 12 tahun UMS tertubuh di Sabah. Mereka mengharapkan UMS bukan hanya dapat memacu kecemerlangan pendidikan anak-anak mereka, tetapi juga membawa pengaruh atau impak positif kepada masyarakat luar bandar yang terpencil seperti di Long Pasia.

Dalam ucapan balasnya, Prof. Datuk Dr. Mohd Noh Dalimin, bagi pihak UMS mengucapkan rasa terima kasih di atas sambutan yang diberikan. UMS prihatin dan fokus bukan hanya sebagai sebuah institusi pengajian tinggi yang mengeluarkan produk (graduan) berkualiti semata-mata. Misi membawa kecemerlangan ilmu pendidikan ke segenap inci desa atau kampung yang jauh di pedalaman turut dijadikan matlamat utama UMS. Dalam ertikata yang lain, setiap anak didik UMS yang akan lahir dari

Menara Gading UMS malah kumpulan penyelidik UMS itu sendiri akan dimapangkan intelektualiti mereka, bukan hanya berbekalkan ilmu yang membolehkan mereka bersaing di peringkat global sahaja, malah mereka juga mewarisi keaslian, kesungguhan dan kekekalan yang selama ini dimiliki oleh masyarakat pedalaman seperti di Long Pasia.

Perjanjian Persefahaman (MoU) di antara UMS dan Long Pasia akan merealisasikan penubuhan Stesen Penyelidikan UMS di kampung itu. Dari kepelbagai aktiviti atau kajian di stesen penyelidikan ini kelak akan berupaya meningkatkan lagi prasarana pendidikan, kemajuan ekonomi, kualiti kesihatan dan memasyurkan lagi keunikan alam dan budaya masyarakat di Long Pasia.

Prof. Datuk Dr. Mohd Noh Dalimin juga menyentuh mengenai ‘kebetulan’ bahawa beberapa orang pemain bola yang beraksi untuk Sabah malah ada yang pernah bermain di peringkat Kebangsaan seperti Andrew Laban (Pengerusi JKJK) dan abangnya Harun Laban yang berasal dari Long Pasia, termasuklah Jelius Ating dan Ronny Harun serta beberapa orang lagi dari kampung berhampiran. ‘Kebetulan’ ini mungkin boleh merumuskan satu penyelidikan ke arah memantapkan lagi pengajian Sains Sukan yang dikendalikan di UMS.

Pada hari pertama lawatan pasukan UMS dengan disertai oleh Ketua Kampung dan Pengerusi JKJKnya (Andrew Laban) dan beberapa orang pemimpin kanan kampung telah mengadakan perlawanan bola sepak persahabatan dengan pasukan Long Pasia. Difahamkan bahawa setiap rombongan yang mengadakan lawatan ke Long Pasia pasti akan diajak bermain bola oleh penduduk kampung di atas permukaan padang bola yang cantik dan rata walau pun tiang golnya menggunakan batang bambu dari spesies yang besar dan tahan lama. Hasil kerja tangan penduduk kampung tiang gol itu disaluti cat putih yang jelas di pandangan

mata hanyalah sebatang bambu jika diteliti dari dekat. Selepas perlawanan para pemain kedua pasukan membersihkan badan dalam Sungai Merah yang terletak berhampiran padang bola. Airnya berwarna merah! Sejuk di waktu siang, panas kala malam menyinsing Subuh.

Acara mengisi Malam Kebudayaan sempena kunjungan rombongan UMS diisi dengan tiga jenis tarian suku kaum Lundayeh yang dipersembahkan oleh tiga generasi masyarakat itu iaitu, kanak-kanak, remaja dan dewasa. Rombongan UMS terpegun dengan keseragaman yang ditunjukkan oleh tiga generasi ini. Ini mungkin disebabkan selama ini hubungan akrab mereka begitu kuat terjalin dan terpelihara di kampung yang jauh dari pengaruh budaya kota, gemalai dan lintuk tari memukau penonton atau pengunjung luar.

Selain En Hela Ladin Mohd Dahalan (Pendaftar), Hj Rizal Othman (Bendahari), Prof. Dr. Osman Ali (Dekan Sekolah Perubatan) dan Prof Madya Dr. Zulkiflee Mohamed (Dekan Sekolah Pendidikan dan Pembangunan Sosial), rombongan ini juga disertai oleh Prof. Datuk Dr. Nuramly Muslim, seorang Pensyarah Kehormat dari Institut Biologi Tropika dan Pemuliharaan, UMS. Beliau adalah pakar dalam kajian mengenai alam semulajadi dan kajian perhutanan. Dari penyelidikan singkat yang dilakukannya, beliau mendapati bahawa masih banyak khazanah asli dan terlindung yang terdapat di Long Pasia. Jika dimanfaatkan bagi tujuan penyelidikan, ianya akan dapat memangkin kemajuan menyeluruh bukan hanya kepada masyarakat kampung malah Negara Malaysia sebagai salah satu stesen pengkajian dan penyelidikan berkaitan alam semulajadi dan tumbuhan serta hidupan hutan tersohor di dunia.

Pada lawatan singkat selama dua hari itu, rombongan UMS juga sempat melawat Klinik Desa dan Sekolah Kebangsaan Long

Pasia. Dengan jumlah seramai 600 orang penduduk kampung Long Pasia dapat menikmati kemudahan rawatan dari dua orang jururawat yang bertugas sepanjang masa dengan penuh profesionalisma. Susun atur pejabat dan bilik rawatan yang kemas serta kebersihan yang dijaga sepanjang masa menjadikan Klinik Desa Long Pasia sebagai sebuah entiti yang banyak berjasa menjaga kesihatan penduduk kampung ini. Kebetulan pada masa itu, musim cuti sekolah. Tetapi rombongan sempat juga meninjau keadaan SK Long Pasia yang terletak bersebelahan dengan Klinik dan mempunyai murid seramai 60 hingga 70 orang sahaja, sebagaimana menurut penjaga Sekolah berkenaan.

Mungkinkah dengan Stesen Penyelidikan UMS ini kelak akan dapat menarik minat anak-anak masyarakat Long Pasia menjakkan kaki ke UMS? Justeru itu, peningkatan kualiti pendidikan di tahap pendidikan rendah seperti di SK Long Pasia ini perlu menarik minat semua pihak dan tidak dibeban kepada guru-guru di SK Long Pasia sahaja, yang dari segi bilangannya melebihi jumlah dua orang kakitangan kesihatan (Jururawat desa) Klinik Desa yang menjaga kebajikan kesihatan 600 orang penduduk Long Pasia. Mesej yang jelas perlu diterima secara positif dan menjadi pemangkin kepada usaha memperkasakan pendidikan luar bandar.

Semoga artikel ini akan menjadi landasan ke arah pembangunan Masyarakat Long Pasia dengan disusuli pelbagai tindakbalas yang akan memelihara dan memasyurkan ‘produk’ Long Pasia dan janganlah pula ianya mengundang pihak yang hanya bermotifkan keuntungan dengan mengaut rakus khazanah yang selama ini terpendam di Kuala Sungai Merah. “Membongkar Rahsia Kuala Sungai Merah” bertujuan untuk mengajak kita semua untuk bersama memulihara dan melestari alam semulajadi yang kaya dengan flora dan fauna serta hidupan hutan lainnya...

